



Broj: 06-1-07-1-2190/12
Sarajevo, 10.01.2013. godine

Na osnovu člana 2.9 stav (1) tačka 9., a u vezi sa članom 10.15 Izbornog zakona Bosne i Hercegovine ("Službeni glasnik BiH", broj: 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10) i člana 33. Uputstva o postupku provođenja posrednih izbora zakonodavnih organa vlasti u Bosni i Hercegovini ("Službeni glasnik BiH", broj 83/10 i 94/10), Centralna izborna komisija Bosne i Hercegovine je na 3. sjednici, održanoj dana 10.01.2013. godine, d o n i j e l a

ODLUKU

o utvrđivanju rezultata posrednih izbora i dodjeli mandata iz Skupštine Kantona 10 za Dom naroda Parlamenta Federacije Bosne i Hercegovine iz reda srpskog naroda

(1) Centralna izborna komisija Bosne i Hercegovine utvrđuje rezultate posrednih izbora i dodjeljuje mandat za Dom naroda Parlamenta Federacije Bosne i Hercegovine iz Skupštine Kantona 10 iz reda srpskog naroda sljedećem delegatu:

Marko Bosnić – kandidatska lista Saveza nezavisnih socijaldemokrata – SNSD – Milorad Dodik

(2) Sastavni dio ove odluke je tabelarni prikaz rezultata izbora i raspodjele mandata iz Skupštine Kantona 10 iz reda srpskog naroda za Dom naroda Parlamenta Federacije Bosne i Hercegovine.

Obrazloženje

Darko Horvat podnio je ostavku na funkciju zastupnika u Skupštini Kantona 10 iz razloga imenovanja za ministra rada, zdravstva, socijalne skrbi i prognanih u Vladi Kantona 10. S tim u vezi, Centralna izborna komisija Bosne i Hercegovine je donijela odluku o utvrđivanju prestanka mandata zastupnika u navedenoj Skupštini broj: 06-1-07-1-882/12 od 16.08.2012. godine.

Obzirom da je imenovani obavljao ujedno i funkciju delegata u Domu naroda Parlamenta Federacije Bosne i Hercegovine, Centralna izborna komisija Bosne i Hercegovine je na 55. sjednici održanoj dana 13.09.2012. godine donijela odluku o prestanku mandata broj: 06-1-07-1-1048/12 u skladu sa članom 1.10 stav (1) tačka 8. i članom 10.17 stav (2) Izbornog zakona Bosne i Hercegovine.

Članom 10.17 Izbornog zakona BiH propisano je da ukoliko neko mjesto ostane upražnjeno usljed smrti, ostavke ili trajne onesposobljenosti delegata u Domu naroda Parlamenta Federacije BiH, to mjesto popunjava sljedeći kvalificirani kandidat na istoj listi na kojoj je bio delegat koji je umro, dao ostavku ili je trajno onesposobljen. Ukoliko na listi nema preostalih kandidata, mandat se dodjeljuje neizabranom kandidatu sa najvišim količnikom s druge liste koji se kandidira za odgovarajući konstitutivni narod ili grupu ostalih u istom kantonu. Ukoliko nema takvog kandidata, Centralna izborna komisija BiH vrši preraspodjelu tog mjesta u skladu s članom 10.16 stav (2) ovog Zakona.

Uvidom u kandidatsku listu političke stranke Savez nezavisnih socijaldemokrata – SNSD - Milorad Dodik za izbor delegata u Dom naroda Parlamenta Federacije BiH iz reda srpskog naroda sa koje je izabran Horvat Darko, a iz Skupštine Kantona 10, utvrđeno je da na listi nema preostalih kandidata.

Nadalje, članom 10.16 stav (2) navedenog Zakona propisano je da Centralna izborna komisija BiH vrši ponovnu raspodjelu mjesta koja se ne mogu popuniti iz jednog kantona odmah po završetku prvog kruga izbora delegata u Dom naroda Parlamenta Federacije BiH u svim kantonima. Centralna izborna komisija BiH vrši preraspodjelu tog mjesta neizabranom kandidatu koji ima najviši količnik na svim listama koje se kandidiraju za odgovarajući konstitutivni narod ili grupu ostalih u svim kantonima.

Uvidom u kandidatske liste za Dom naroda Parlamenta Federacije Bosne i Hercegovine utvrđeno je da ne postoji ni jedan neizabrani kandidat na svim listama koje se kandidiraju za delegata iz reda srpskog naroda.

Pored toga, uvidom u sastav kantonalnih skupština utvrđeno je da trenutno u Skupštini Kantona 10 postoje dva zastupnika iz reda srpskog naroda koji se ne nalaze na kandidatskoj listi za Dom naroda Parlamenta Federacije Bosne i Hercegovine, a to su: Predrag Kunjadić i Marko Bosnić.

S tim u vezi, Centralna izborna komisija Bosne i Hercegovine je Skupštini Kantona 10 uputila akt broj: 06-1-07-1-1048/12 od 03.10.2012. godine sa zahtjevom za dostavu kandidatskih listi za popunu upražnjenog mjesta u Domu naroda Parlamenta Federacije Bosne i Hercegovine, u skladu sa odredbama Izbornog zakona Bosne i Hercegovine i Uputstva o postupku provođenja posrednih izbora zakonodavnih organa vlasti u Bosni i Hercegovini.

Po dostavljenim kandidatskim listama, Centralna izborna komisija Bosne i Hercegovine je na 90. sjednici, održanoj dana 20.11.2012. godine donijela Odluku o ovjeri kandidatske liste političkog subjekta Savez nezavisnih socijaldemokrata – SNSD – Milorad Dodik i Odluku o ovjeri kandidatske liste političke stranke DNS – Demokratski narodni savez za izbor delegata u Dom naroda Parlamenta Federacije Bosne i Hercegovine iz Skupštine Kantona 10.

Skupština Kantona 10 je dana 25.12.2012. godine, dostavila Centralnoj izbornoj komisiji Bosne i Hercegovine akt broj: 01-02-49-80.6/12 od 21.12.2012. godine, te u prilogu istog cjelokupan materijal o provedenim posrednim izborima za Dom naroda Parlamenta Federacije BiH, tj. o provedenoj proceduri za popunu upražnjenog mjesta delegata iz reda srpskog naroda u Domu naroda Parlamenta Federacije BiH kako bi Centralna izborna komisija Bosne i Hercegovine postupila u skladu sa članom 2.9 stav (1) tačka 9. a u vezi sa članom 10.15 Izbornog zakona Bosne i Hercegovine, te utvrdila i potvrdila rezultate posrednih izbora iz Skupštine Kantona 10 za Dom naroda Parlamenta Federacije Bosne i Hercegovine iz reda srpskog naroda.

Posredni izbori za Dom naroda Parlamenta Federacije Bosne i Hercegovine iz Skupštine Kantona 10 provedeni su tajnim glasanjem, a uvidom u glasački materijal utvrđeno je da u postupku izbora delegata iz reda srpskog naroda glasala su tri (3) poslanika dok jedan (1) poslanik nije glasao, jer nije bio prisutan na sjednici Skupštine.

Na osnovu uvida u dostavljeni materijal utvrđeni su sljedeći rezultati:

1. Kandidatska lista političke stranke Demokratskog narodnog saveza-DNS dobila je **jedan (1)** glas,
2. Kandidatska lista političke stranke Savez nezavisnih socijaldemokrata-SNSD-Milorad Dodik dobila je **dva (2)** glasa.


U skladu sa članom 10.15 Izbornog zakona BiH dodjela mandata vrši se kandidatskim listama po sistemu proporcionalne zastupljenosti.

U skladu sa rezultatima posrednih izbora koje je utvrdila Centralna izborna komisija Bosne i Hercegovine i naprijed navedenom odredbom Izbornog zakona Bosne i Hercegovine, dodijeljen je mandat delegatu iz reda srpskog naroda, na način kako je to navedeno u stavu (1) dispozitiva ove odluke.

Ova odluka će biti objavljena dana 11.01.2013. godine u 12:00 sati na web stranici Centralne izborne komisije Bosne i Hercegovine, www.izbori.ba i smatraće se da je danom objavljivanja ista dostavljena svim učesnicima u izbornom procesu.

PRAVNA POUKA: Protiv ove odluke, u skladu sa članom 6.9 stav (1) i (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva dana od dana objavljivanja ove odluke na web stranici Centralne izborne komisije Bosne i Hercegovine, www.izbori.ba.

Žalba se podnosi putem Centralne izborne komisije Bosne i Hercegovine neposredno u sjedištu Centralne izborne komisije Bosne i Hercegovine, ulica Danijela Ozme broj 7, Sarajevo ili putem faks aparata na broj: 033/251-329.



Zamjenjuje predsjednika

Stjepan Mikić, član

Dostavljeno:

- Skupštini Kantona 10
- a/a

PRILOG: Tabelarni prikaz rezultata izbora i raspodjele mandata iz Skupštine Kantona 10 iz reda srpskog naroda za Dom naroda Parlamenta Federacije Bosne i Hercegovine.

R/B	NAZIV LISTE	Broj glasova/1	3	Osvojeni mandati
1.	Kandidatska lista Savez nezavisnih socijaldemokrata-SNSD-Milorad Dodik	<u>2,00</u>	<u>0,66</u>	1
2.	Kandidatska lista Demokratskog narodnog saveza-DNS	<u>1,00</u>	<u>0,33</u>	0